

TITAH
KEBAWAH DULI YANG MAHA MULIA PADUKA SERI BAGINDA SULTAN HAJI HASSANAL
BOLKIAH MU'IZZADDIN WADDAULAH IBNI AL-MARHUM SULTAN HAJI OMAR 'ALI
SAIFUDDIEN SA'ADUL KHAIRI WADDIEN, SULTAN DAN YANG DI-PERTUAN NEGARA BRUNEI
DARUSSALAM

SEMPENA
SAMBUTAN HARI ULANG TAHUN
ANGKATAN BERSENJATA DIRAJA BRUNEI KE-62 TAHUN 2023

TARIKH:

HARI RABU,
31 MEI 2023

Assalamu'alaikum Warahmatullahi Wabarakatuh
Bismillaahir Rahmaanir Raheem

Alhamdulillah Rabbil 'Alameen, Wabihiee Nasta'eenu 'Alaa Umuuriddunya Wadden, Wassalaatu' Wassalaamu 'Ala Asyarafil Mursaleen, Sayyidina Muhammaddin, Wa'alaa Aalihee Wasahbihee Ajma'een, Waba'du.

Beta bersyukur kehadiran Allah SWT kerana dapat hadir pada pagi ini untuk meraikan Sambutan Hari Ulang Tahun Angkatan Bersenjata Diraja Brunei (ABDB) yang ke-62 tahun.

Sebentar tadi kita telah menyaksikan perbarisan raksasa yang sangat bermutu lagi kemas yang melambangkan tahap kecekapan dan kewibawaan Angkatan Bersenjata Diraja Brunei.

Dalam keadaan sekarang semua negara kecil dan besar, sama-sama perlu membina persekitaran dalaman, kawasan rantau dan sejagat yang aman dan damai. Oleh itu, ABDB perlu terus komited dalam menjaga kedaulatan dan keamanan Negara Brunei Darussalam sambil dalam masa yang sama menghormati dan memperbaiki hubungan dengan negara-negara lain.

Kita sedia menyedari bahawa membina kekuatan bukanlah kerja yang mudah, ia sangat bergantung kepada keutuhan organisasi dan keberkesanan kepimpinan. Pada hemat Beta, ABDB yang kecil boleh menjadi kuat dengan adanya kesatuan yang kukuh dan

berkebijaksanaan membentuk struktur serta mempunyai keupayaan tempur, kapasiti anggota, logistik dan kepimpinan yang berkualiti.

Mengenai kepimpinan, Beta sangat berharap supaya model kepimpinan ABDB yang berpaksikan nilai-nilai teras ABDB, maqasith Syariah dan falsafah Melayu Islam Beraja akan benar-benar dapat difahami, dihayati dan diamalkan sebagai panduan utama oleh semua peringkat pemimpin ABDB.

Dalam usaha memantapkan keupayaan dan mengambil sukut baik hari yang bersejarah ini, Beta sukacita memperkenankan penubuhan Skuadron Pesawat Taktikal Armada dan pembesaran Skuadron Peronda bagi Tentera Laut Diraja Brunei. Skuadron Pesawat Taktikal Armada ini akan mengawasi lebih jauh lagi kawasan maritim zon ekonomi eksklusif negara. Manakala pembesaran Skuadron Kapal Peronda berikutan dengan pertauliahahan KDB AS-Siddiq baru-baru ini adalah untuk menampung keperluan dan memperluaskan lagi skop operasi maritim khusus di perairan persisiran pantai negara.

Dalam konteks keberkesanan pertahanan, Beta gembira dengan pencapaian operasi sepadu sekuriti dan sempadan darat dibawah teraju Markas Angkatan Bersama ABDB yang dilaksanakan melalui pendekatan seluruh kerajaan 'Whole of Government Approach' dan pendekatan senegara 'Whole of Nation', dengan keterlibatan langsung Unit Batalion Trop Risik, Skuadron Bot Tempur Tentera Darat Diraja Brunei, Squadron Unmanned Aerial System (UAS) Tentera Udara Diraja Brunei, Tentera Laut Diraja Brunei serta agensi-agensi penguatkuasa undang-undang kebangsaan lainnya serta tidak terkecuali juga penglibatan institusi mukim dan kampung melalui pengawasan kejuruan di seluruh negara.

Hasil operasi sepadu telah mencapai banyak kejayaan dalam menyumbang penurunan trend kes-kes tangkapan sejak penubuhan Kawasan-kawasan operasi Area of Operations (AOP) di beberapa tempat strategik dan hotspots seluruh negara sejak April tahun 2020 apabila negara berhadapan dengan gelombang pandemik COVID-19.

Dalam pembangunan modal insan kita boleh berbangga dengan Institusi Pendidikan dan Latihan di ABDB telah mencapai kejayaan-kejayaan signifikan. Kursus-kursus dan program yang dijalankan di Akademi Pertahanan Institut Latihan ABDB, Sekolah-sekolah Latihan Tentera Darat, Tentera Laut, dan Tentera Udara telah memperolehi pengiktirafan kebangsaan dan antarabangsa.

Ini dapat dilihat dari permintaan yang tinggi oleh angkatan-angkatan tentera sahabat bagi mengikuti kursus-kursus profesional di ABDB. Pada tahun ini sahaja, Sekolah Pegawai Kadet Akademi Pertahanan, Sekolah Infantri Tentera Darat Diraja Brunei dan Pusat Latihan

Tentera Laut Diraja Brunei telah menerima penuntut daripada luar negara buat pertama kalinya.

Beta gembira bahawa mulai tahun ini, ABDB melalui Institut Latihan ABDB akan berupaya menghasilkan seramai 960 anggota tentera yang terlatih berbanding sebelumnya hanya 540 anggota setahun. Beta percaya dengan perkembangan ini, ABDB mampu untuk mengisi jawatan-jawatan yang sudah lama kosong sejak beberapa tahun ini dan mengukuhkan lagi bilangan tentera yang terlatih, di samping memberi peluang pekerjaan kepada belia-belia dan beliawanis yang mencari pekerjaan.

Di sambutan Hari Ulang Tahun ABDB pada hari ini, Beta gembira dengan penglibatan angkatan-angkatan Tentera Udara negara sahabat dalam mempamerkan pesawat-pesawat strategik mereka. Semua ini mencerminkan perpaduan dan hubungan diplomasi pertahanan yang kukuh di antara negara-negara sahabat dan Negara Brunei Darussalam. Sementara itu, turut memeriahkan lagi ialah penglibatan syarikat-syarikat pertahanan tempatan dan luar negara mempamerkan produk-produk industri pertahanan masing-masing. Syabas dan diucapkan setinggi-tinggi penghargaan.

Beta juga sangat teruja dan bangga dengan komitmen berterusan di kalangan mantan-mantan perajurit ABDB dalam sama-sama membangun dan menjaga kesejahteraan negara. Walaupun mereka sudah bersara dari perkhidmatan tentera, namun masih aktif dengan kerja-kerja berkebajikan seperti menjadi sukarelawan dalam pertubuhan-pertubuhan tertentu, malah ada juga yang berjaya dalam perniagaan, dilantik sebagai pemimpin di peringkat akar umbi dalam institusi kampung dan mukim, dan dilantik menjadi Ahli di dalam Majlis Mesyuarat Negara mewakili zon-zon tertentu. Ini adalah contoh-contoh terbaik yang boleh menjadi inspirasi kepada generasi penerus di masa hadapan. Beta ucapkan setinggi-tinggi penghargaan kepada mereka, dan berharap Persatuan PERWIRA akan terus berperanan menyatupadukan pesara-pesara atau veterans ABDB dalam usaha memelihara keselamatan dan keamanan negara.

Di hari yang berbahagia ini juga, kita tidak lupa mendoakan pegawai-pegawai dan perajurit yang telah kembali kerahmatullah semoga roh-roh mereka ditempatkan bersama-sama para syuhada. Aamiin Ya Rabbal 'Alamin.

Akhirnya, Beta mengucapkan tahniah dan selamat meraikan Hari Ulang Tahun Angkatan Bersenjata Diraja Brunei yang ke-62 tahun kepada seluruh warga ABDB yang masih berkhidmat dan mereka yang telah bersara yang berada di dalam atau sedang bertugas di luar negara.

Sekian Wabillahit Taufeq Walhidayah, Wassalamu 'Alaikum Warahmatullahi Wabarakatuh.

